


TEZAU LITURGIC

1 MAI

ACATISTUL SF. IERARH-MUCENIC MACARIE, MITROPOLITUL KIEVULUI



MOSCOVA, 2000



Акафист
священномученику Макарию,
митрополиту Киевскому,
чудотворцу

Кондак 1

Избранный чудотворче и преславный
угодниче Христов, святителю отче Макарие,
присно от лютых и напастей молитвами твоими
избавляеми приносим ти похвальная. Ты же, яко
имеяй дерзновение ко Господу, не престаи от
всех бед свободдати любовь тебе зовущих:
Радуйся, Макарие, архиереом честное
украшение.

Икос 1

Ангела земнаго званием и человека небеснаго
житием, яви тя небесе и земли Создатель: Емуже
предстоя и ликовствуя непрестанно с небесными
чинми, славословие возсылаеши и молением
грешных людей от земли внемлеши, услыши и
нас ко предстательству твоему усердно

взывающих: Радуйся, яко по имени твоему и житие твое блаженное. Радуйся, Троическим единством священнотайне просвещаяйся. Радуйся, к Триипостасному Свету и наши души возводяй. Радуйся, волю избравшаго тя Господа Христа творивый. Радуйся, и нас творити волю Его своим житием научаяй. Радуйся, Спасителя Бога любви искренний подражателю. Радуйся, и наши души любовью Креста Его просвещаяй. Радуйся, Духа Пресвятаго сосуде избранный. Радуйся, и на нас благодать Его призываяй. Радуйся, с Царицей Небесной пред Спасителем нашим предстателю. Радуйся, непрестанный ангелов собеседнице. Радуйся, о роде человечестем усердный молитвенниче Радуйся, Макарие, архиереом честное украшение.

Кондак 2

Видяще святыя мощи твоя, многая чудеса источающия, и покланяющесе им, яко дивному знамени милости Господней в земли нашей, радостно благодарим Бога, благоговейно поюще Ему: Аллилуиа.

Икос 2

Разумом просвещенным свыше вразумляя заблуждшия, сильный поборник был еси истины Христовой, святителю Макарие, егда в стране Литовстей царие земстии и князи людстии собращася вкупе на верных чад Церкви Христовой, мы же трудами и молитвами твоими от иноплеменнаго и иновернаго ига избавльшеся, вопием ти сице: Радуйся, града Вильны славное прозябение. Радуйся, верный хранителю апостольских преданий. Радуйся, истины Православия страже неусыпный. Радуйся, столпе благочестия несокрушимый. Радуйся, святителей древних подражателю. Радуйся, крепосте наша духовная. Радуйся, твердое веры и правды охранение. Радуйся, пастырем и пасомым образе благочестия. Радуйся, Церкви преславная красото. Радуйся, архиереев доброто. Радуйся, православия светило. Радуйся, яко духовную жертву непрестанно ко Господу возносиши. Радуйся, Макарие, архиереом честное украшение.

Кондак 3

Сила свыше осени тя, истинный пастырю душ христианских, егда противу волков злых,

ищущих стадо Христово расхитити, твердо стоял еси, и духовныя чада твоя и благоверную княгиню в Православии укрепил еси, и ныне на небесах предстоя Христу Богу, моли Господа Славы, да умножит в земли нашей благочестие и единомыслие: оступившия же от православныя Церкви светом познания Своего да озарит, да и тии с нами воззовут Ему: Аллилуиа.

Икос 3

Имея воистинну, блаженне Макарие, великую любовь стаду своему, людем Русским явился еси наставник мудрый ко спасению, нам же молитвенник теплый и скорый помощник показался еси, вся подвизая благодарно взывати тебе: Радуйся, от рук агарянских смертную испивый чашу. Радуйся, от уст верных сего ради присно восхваляемый. Радуйся, мучениче, к небесным селениям дух наш присно возводяй. Радуйся, подвижниче, нас, от юности страстьми обуреваемых, безстрастию поучаяй. Радуйся, пастырю, благовествуяй нам глагол Христов силою многою. Радуйся, отче, чадом своим путь ко спасению показавый. Радуйся, града Киева небесный покровителю. Радуйся, священнослужителям добрый наставниче.

Радуйся, монахов и мирских людей мудрый учителю. Радуйся, страны нашей преславный светильниче. Радуйся, всех молящихся прибежище. Радуйся, скорбящих утешителю. Радуйся, Макарие, архиереом честное украшение.

Кондак 4

Бурею латинскаго еретическаго неистовства и блуждания обуреваемы русския людие обретоша в тебе, священномучениче Макарие, кормчаго изрядна во спасение, темже и мы, зря житейское море, воздвигаемое бурею страстей и неверия, притекаем к тихому пристанищу молитв твоих и к Богу, возводящему от тли живот наш, вопием: Аллилуиа.

Икос 4

Слышавше и видевше, святе Макарие, ближнии и дальнии души твоя доброту и святость жития твоего, избра тя в архипастыря Церкви литовско-русския и обретоша в тебе пастыря добраго, за овцы свою душу положити готоваго, с веселием зываху: Радуйся, избранниче Божий, преславный. Радуйся, сосуде чистоты и ревности исполненный. Радуйся,

церковная похвало. Радуйся, лести латинския посрамителю. Радуйся, Православия догматов уяснителю. Радуйся, гонимых правды ради защитниче. Радуйся, любомудрствующим в Бозе благий советниче. Радуйся, лукаваго мудрования обличителю. Радуйся, воздержания учителю. Радуйся, в простоте сердца верующим светлое веры правило. Радуйся, в унижении житие свое проводящим образе кротости и смирения. Радуйся, спасающихся ободрение. Радуйся, Макарие, архиереом честное украшение.

Кондак 5

Боготечною звездою востекл еси, святителю Макарие, ко святому граду Киеву, ревностию снедаем о доме Божиим и о спасении врученных ти душ, аще и ведал еси о нашествии агарян, с мечем смерти ожидавших тя на пути, обаче вся презрел еси во еже исполнити должная. И совершая хотение твое, в соборной церкви града Киева ныне нетленно почиваеши и чадам твоим выну предстоиши, научи, о блаженне, и нас, расслабленных духом, путь спасению в Бозе совершати и на сем пути вся препоны молитвами твоими препобеждати, да ни смерть, ни живот не разлучат ны от любви Божия, ниже

заклучат устен наших, вопиющих Спасителю Богу: Аллилуиа.

Икос 5

Увидевше вси скрыголовстии людие, в церкви сущие, агарян нечестивых губительное нашествие, смертным ужасом одержими бывше, бежаху. Ты же, о досточудне, яко доблий воин Христов, на страже служения твоего пребыл непоколебим, и тако мечем нечестивых от служения временнаго преставлен еси к славословию вечному пред Господом всяческих, Ему же с горними чинми сослужа, приими наша хваления таковая: Радуйся, с безкровною жертвою кровь свою в жертву угодную Богу принесый. Радуйся, с херувимы Животворящей Троице Трисвятую песнь присно припеваяй. Радуйся, небесными чинми невидимо дориносимо, к Богу вознесенный. Радуйся, с праведными вечное Аллилуиа воспеваяй. Радуйся, до крове исповедавый Троицу единосущную. Радуйся, горе имеяй пламенеющий дух. Радуйся, достойно возблагодаривый Господа. Радуйся, с шестикрылатыми и многоочитыми победную песнь поющих. Радуйся, Пречистых Таин

Христовых воистинну в жизнь вечную причастивыйся. Радуйся, святая во освящение вкусивый. Радуйся, апостольския власти в чести преемниче. Радуйся, чудес источниче. Радуйся, Макарие, архиереом честное украшение.

Кондак 6

Проповедник истины Православия явился еси, богомудре Макарие, якоже бо древле во святем граде равноапостольная Елена с патриархом Макарием честный Крест Христов воздвизаше людям взывавшим: «Господи, помилуй», сице и ты, русскаго Сиона первосвятителю, с княгинею Еленою в сердцах верных оный Крест утверждал еси, да вси единым сердцем и едиными усты взывают на нем пригвожденному Богу: Аллилуиа.

Икос 6

Возсия в храме премудрости Господней чудный свет от пречистых мощей твоих, предивный чудотворче, его же видевшие два мужа, поведаста благоговейнейшему первосвятителю Иову и всем людям прославляюще Бога, таковую благодать ти давшего, роди же русскии от лет древних

навыкоша воспевати ти: Радуйся, светильниче, огнем божественных благодати возжженный. Радуйся, благовестителю света Христова. Радуйся, ангельское житие являй. Радуйся, грешником наставниче покаяния. Радуйся, яко твоим ходатайством благодать спасения всем даруется. Радуйся, яко твоими молитвами расточенная чада церковная собираются. Радуйся, яко твоим молением злоба и коварство посрамляются. Радуйся, яко предстательством твоим миром ограждаемся. Радуйся, подателю милости тоя требующим. Радуйся, ходатаю небесных и земных благ почитающим память твою. Радуйся, о людех теплое моление возносяй. Радуйся, всех молящихся прибежище. Радуйся, Макарие, архиереом честное украшение.

Кондак 7

Хотяй представить Господу овцы своя люди избранны, потщался еси всемерно княгиню Елену и люди утвердити в правоверии, всех наставляяй к житию богоугодному. Не престай, святителю, и ныне о стаде твоём молитися Вседержителю Богу, да подаст народоправителем мудрость и силу, пастырем ревность о доме Господнем и всем вся, яко же

спасения полезная, о них же благодаряще Бога, да вопиют: Аллилуиа.

Икос 7

Новое знамение милости твоея яви щедродатель Господь, граду Киеву множае четыреста лет нетленны сохраняя честныя мощи твоя, священномучениче блаженне Макарие, о сем благодаряще дивнаго во святых Господа, с любовью ублажаем тя: Радуйся, яко кровию твоею, аки багряницею, Церковь украсися. Радуйся, яко нетленным телом твоим, аки алмазом безценным, храм премудрости Господней просветися. Радуйся, яко тобою лик мученический преумножися. Радуйся, яко кровию твоею семена веры в земли нашей возрастишася. Радуйся, яко тобою небеса возвеселишася. Радуйся, яко о тебе и земля радуется. Радуйся, о Дусе Святе души благочестивыя возвеселяяй. Радуйся, печаль по Бозе кающимся подаваяй. Радуйся, в терпении крест скорбей несущих утверждаяй. Радуйся, бодросте во обстоянии сущих. Радуйся, напутствуемым мужеством снабдение. Радуйся, Макарие, архиереом честное украшение.

Кондак 8

Странное купно же и дивное видение явися обретшим тя в церкви скрыголовстей магометаном, егда узревша тя, святителю Христов, единого токмо безтрепетно престолу Господню предстояща и моление о соединении всех возсылающа, обаче сим не вразумишася, нечестивии, христиански воспети Владыце всех: Аллилуиа.

Икос 8

Весь в Бозе живеши, преблаженне отче наш, но и нас грешных не оставляеши, славу в вышних Богу воспеваеши, и zde пречистыми мощами твоими пребываеши, темже яко живу суцу с нами от всего сердца глас хвалы приносим ти: Радуйся, яко по слову апостольскому, всем вся был еси. Радуйся, яко спасения ради чад твоих себе на смерть предал еси. Радуйся, посещавый стадо твое не нуждою, но волею и по Бозе. Радуйся, рабе Господень благий и верный. Радуйся, вшедый в радость Господа твоего. Радуйся, данный тебе талант преумноживый. Радуйся, в мзду приявый благодать исцелений. Радуйся, болящих здравие. Радуйся, скорбящих утешение. Радуйся,

явлением мощей твоих в Православии нас утверждай. Радуйся, яко твоего нетленного телесе демоны трепещут. Радуйся, и нас пред гробом твоим стоящих умиления исполняеши. Радуйся, Макарие, архиереом честное украшение.

Кондак 9

Все естество ангельское удивися преславней кончине твоей, ею же житие твое достойно венчал еси, лик страстотерпцев с любовью ты преуспевай, такожде и Церковь Русская, купно со Владимиром и Ольгою, со страстотерпцы Борисом и Глебом, с Михаилом святителем, с Антонием и Феодосием и всеми чудотворцы Печерскими в молитвенники ты приемше, благодарно о тебе вопиют: Аллилуиа.

Икос 9

Витийства нашего немощь, восхвалити ты хотяще, добре вемы, обаче да не отрынет нас благостыня твоя, из глубины сердца вопиющих: Радуйся, архиерею Бога вышняго. Радуйся, пастырю нам добрый. Радуйся, правды служителю нелицеприятный. Радуйся, в безвестности начало жития своею сохранивый.

Радуйся, тем пастыреначальнику Христу подражавый. Радуйся, яко тебе безвестная и тайная премудрости Божия явлена быша. Радуйся, яко края желаний достигл еси. Радуйся, яко в тебе мудрствовася, еже и во Христе Иисусе. Радуйся, яко послушлив был Ему даже до смерти, смерти же мученической. Радуйся, яко всяко колено небесных и земных восхваляет тя. Радуйся, во славу Христову потрудивыйся. Радуйся, любви божественныя исполненный. Радуйся, Макарие, архиереом честное украшение.

Кондак 10

Спасти хотя от вечныя гибели стадо твое, злоухищрению латинскими прельщаемое, подъял еси, блаженне, труды многия и болезни, обходя бо грады и веси, князи и люди утешал еси, пастыри поучал еси, противящихся истине обличал еси, всяко тщание прилагая, да вси православнии воспевают Богу согласную песнь: Аллилуиа.

Икос 10

Стена твердая был еси православным россиянам противу врагов видимых и

невидимых, и ныне, угодниче Христов, молитвами твоими, волны неверия и лжеучений отврати от нас, отечество твое сохрани от глада, губительства, нашествия иноплеменников и междуусобных брани, и от всяких бед да благодарно зовем ти: Радуйся, на Церковь святую восстающим сильный противоборниче. Радуйся, провозвестником Евангелия неутомимый споспешниче. Радуйся, во тьме заблуждений сидящих светом Христовым просвещаяй. Радуйся, столпе Церкви, его же утверди Премудрость Божия. Радуйся, на языки, брани хотящи, гнев Божий проливаяй. Радуйся, миротворцам милость Господню посылаяй. Радуйся, славо и благопоспешение правителем нашим. Радуйся, на враги победы воинству нашему ходатаю. Радуйся, устрашение агарянских полчищ. Радуйся, злочестия и неприязни искоренителю. Радуйся, мира и незлобия учителю. Радуйся, на подвиг брани духовная вдохновителю. Радуйся, Макарие, архиереом честное украшение.

Кондак 11

Песнь Трисвятую с херувимы и серафимы Животворящей Троице припевая, отче наш

Макарие, пособствуй и нам, житейския попечения отлагающе во вся времена гласы преподобными воспевати на херувимех Сидящему: Аллилуиа.

Икос 11

Светильник горяй и святяй, показался еси, святителю Христов, егда из под спуда смиренного иноческаго жительство поставлен был еси на свещнице митрополии Киевския, да светиши всем чадом Церкви русския сущим, благодарно тебе зовущим: Радуйся, яко свет твой просветися пред верными и неверными. Радуйся, яко о тебе вси вернии прославиша Отца Небеснаго. Радуйся, свете, его же не объят тьма латинская. Радуйся, яко тобою мати градов русских Киев хвалится. Радуйся, яко тебе ради и вся Русская земля веселится. Радуйся, единокровных учителю единения. Радуйся, в междуусобии сущим мира проповедниче. Радуйся, взыскующим Царствия Божия незримый наставниче. Радуйся, яко всем труждающимся и обремененным образ подвига сего являеши. Радуйся, яко нас хладных подвигом любве твоея возгреваеши. Радуйся, ревновати о своем спасении нас научаеши.

Радуйся, Божий избранниче, Радуйся, Макарие, архиереом честное украшение.

Кондак 12

Благодать Пресвятаго Духа испроси нам, предстателю наш, да вся немощная в нас уврачуется, и оскудевающая восполняется; невернии и заблудшии к вере Христовой да обратятся, подражающе вере твоей; малодушнии и отчаянии надеждою несумненною да утвердятся, упованием на молитвы твои укрепляемы; жестоковыйнии и немилостивии любовь неоскудевающей да воспламенятся и твоею любовью распаляеми вси согласно да воззовут к Источнику всякия благодости: Аллилуиа.

Икос 12

Поющим великия добродетели твои и честным мощам твоим покланяющимся, достохвальне отче Макарие, умоли Господа сил даровати коемуждо потребная и возбуди нас тепло взывати ти: Радуйся, от Господа достойно венчанный. Радуйся, ангелы радостно восхваляемый. Радуйся, чудесы от честных мощей твоих паче слова прославляемый.

Радуйся, Михаила, Иллариона и прочих святителей киевских достойный приемниче. Радуйся, аще и внезапную, но преславную кончину приявый. Радуйся, пред престолом Господним неусыпный наш молитвенниче. Радуйся, на небесную высоту воспаривый. Радуйся, мудрость змиину и кротость голубину сочетавай. Радуйся, заблудшия овцы на раменах своих ко Отцу принесый. Радуйся, крепкая палица Христова. Радуйся, истинная закона Божия скрижаль и источник чистыя благодати. Радуйся, яко память твоя присно с похвалами. Радуйся, Макарие, архиереом честное украшение.

Кондак 13

О предивный и преблаженный угодниче Христов, святой священномучениче, услыши нас грешных чад твоих и прими сие малое благохваление наше, многомогущим предстательством твоим, отврати гнев Божий, праведно за грехи наши на ны движимый, и испроси нам прощения множества беззаконий наших, умоли даровати христианскую кончину живота нашего, да по велицей милости Господней муки вечныя избавльшеся,

сподобимся улучшить небесных благих, их же ты ныне наслаждаешься, поя Богу: Аллилуиа.

(Этот кондак читается трижды, а затем икос 1 и кондак 1)

Молитва

О великий угодниче Христов, святителю отче Макарие! В житии твоём чад твоих любовью смерти крепчайшею возлюбивый и за них душу свою предавший, призри от Горних Обителей на нас, вонми воздыханиям нашим сердечным, и помози нам недостойным и смиренным. Молися, святителю милостивый, да речет Он мир на люди Своя и на преподобныя Своя и на обращающия сердца к Нему. Даруй нам, отче наш, дух любви твоея ко святей матери нашей Церкви Христовой, укрепи ны, расслабленныя духом, отеческия предания хранити и о мимошедших напастех память спасительную имети и всегда благодарственная благодетелю Богу воспевати научи. Предстательством твоим у престола Господа сил испроси Церкви Христовой от ересей и расколов ограждение; к честным мощам твоим притекающим и чтущим святую память твою исполнение благих их прошений, и всем христианом вся ко временней

и вечней жизни потребная, да прославляется о тебе пречестное и великолепное Имя Отца и Сына и Святаго Духа и ныне и присно и во веки веков. Аминь.



**ПОЛНЫЙ
АКАФИСТИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НУЖЕ
НЕБО**